

PEDRO TỸ CARTA HAN MÃN

¹ *Simão Pedro* tỹ ãjag mỹ *carta* rán hã vễ. *Jesus Cristo* tỹ inh fễ vễ, sỹ ti rãnrãj han jé, sỹ tỹ ti *apóstolo* jễ jé. Isỹ ù tỹ inh mré *Jesus Cristo* ki ge kỹ nỹtĩ kar ag mỹ rán hã vễ. Topễ vỹ ẽg kuprẽg, ùn jykre kuryj ẽn, ẽg tỹ ẽg krenkren han mũ tỹ *Jesus Cristo* ki ge jé.

² ãjag to sóg Topễ mré vĩ tĩ, ãjag tỹ ẽg *Senhor* tỹ *Jesus Cristo* ki kanhrãn há han jé, Topễ ki ke gé, ãjag tỹ koměr hã ti ki kanhrãn kãn jé. Kỹ tóg ãjag tar han ke mũ. ãjag krĩ tỹ tóg kãnhvy' henh ke mũ gé.

Topễ tỹ ẽg kuprẽg

³ Topễ ki kanhró ẽg tóg nỹtĩ. Ẽg kuprẽg tóg, ti tỹ ẽg tar han jé, ti tar nĩ ẽn ri ke. Kỹ tóg ẽg tỹ ùn mág han ke mũ gé, ti tỹ tỹ ùn mág nĩ ẽn ri ke. Ẽg tỹ tag ki kanhrãn kỹ ẽg tóg ti jykre jagma mũ há han ke mũ. ⁴ Kỹ Topễ tóg ẽg mỹ nén ù há kãfór tó kỹ: “ẽprã ke kar vỹ nũgme ki vár ke mũ, ag tỹ nén to én mũ ẽn han tugrĩn,” he ja nĩ. Ag jãvo ẽg tóg krenkren ke mũ, kỹ ẽg tóg Topễ ri ke nỹtĩnh ke mũ, mỹr, ha mẽ. ⁵ Hã kỹ vãsãn, ãjag tỹ ti ki rã to tar nỹtĩ jé, ãjag tỹ vễjykre há hã han jé. Vễjykre há han kỹ vễnh kanhrãn kỹ mũm nĩ gé. ⁶ Vễnh kanhrãn kỹ mũ kỹ vễso jykrén nĩ gé. Vễso jykrén kỹ ti tovãnh tũg nĩ gé. Ti tovãnh tũ nĩn kỹ ti jykre hã mũ mũm nĩ gé. ⁷ Ti jykre hã mũ mũn kỹ jagnẽ to há tãvĩ nỹtĩm nĩ gé, ẽg kanhkã kar ag to. Ẽprã ke kar ag to há nỹtĩm nĩ gé. ⁸ ãjag tỹ tag han kãn kỹ tóg há tĩ. Kỹ ãjag tóg

ẽg *Senhor* tỹ *Jesus Cristo* ki kanhrãn há han ke mũ gé. Kỹ ãjag tóg vễjykre há to krónh kenh ke tũ nĩ gé. Kỹ ãjag tóg koměr hã ti ki kanhrãn kãn ke mũ, ha vem nĩ. ⁹ Û tỹ vễjykre há han sór tũ nĩn kỹ tóg ùn kyvó ri ke nĩ, ùn ẽvãnh kórég, ùn kutu ri ke ti nĩ sir. Ẽn vỹ ẽg *Senhor* ki kagtĩg nĩ. Hã kỹ tóg ti kórég han tĩ nĩ.

¹⁰ Inh kanhkã', Topẽ vỹ ãjag kuprẽg. Kỹ vãsãnsãn, vễnh kar tỹ ãjag jykre há tugrĩn ki kanhró nỹtĩ jé, ti tỹ ãjag kuprẽg mũ ẽn ti. Kỹ ãjag tóg tỹ prãnh kenh ke tũ nĩ, ha vem nĩ. ¹¹ Kanhkã ve jé ãjag tóg ke mũ, ha vem nĩ, ẽg *Senhor* tỹ *Jesus Cristo* tũ ti, ẽg krenkren han tĩ ẽn tũ ti. Tũ' henh ke tũ ti nĩ, ti tỹ tá tỹ ùn mág nĩ ti.

¹² Hã kỹ sóg ãjag mỹ tó mãn', tó mãn' he mũ. Ki kanhró ãjag tóg nỹtĩ. Vễnh vỹ há to tar ãjag tóg nỹtĩ, ãjag tỹ mễg mũ ẽn to. ¹³ Ge ra sóg ãjag jyvẽn mãn sór mũ, ãjag tỹ kã jatu tũ nĩ jé. Isỹ ãjag mré nĩ mũ ẽn kã sóg ãjag mỹ tag tó. ãjag jyvẽn mág inh. ¹⁴ Ha vé, kãnhmar sóg iser kỹ inh fãr tovãnh kỹ tĩg ke mũ. Ki kanhró sóg nĩ. Ẽg *Senhor* tỹ *Jesus Cristo* vỹ inh mỹ isỹ kãnhmar tĩg ke ti tó. ¹⁵ Hã kỹ sóg vễnh rãn tag to fũrũn mũ, ãjag tỹ iser kar kỹ kã jatun tũ nĩ jé.

Pedro tỹ Jesus ve ja

¹⁶ Ha vé, inh pijé ãjag mỹ ón mũ', isỹ ãjag mỹ ẽg *Senhor* tỹ *Jesus Cristo* kãtĩg vẽn mũ ẽn tón kỹ, isỹ ti jykre tar tón kỹ. Ti ve inh, ti tỹ tỹ ùn mág pẽ nĩ ti. ¹⁷⁻¹⁸ Ti jóg tỹ Topẽ vỹ ti tỹ ùn mág han. Ti tỹ tóg ùn tar han gé. Ẽg tỹ *Jesus* mré pãnónh kri nỹtĩ ẽn kã ẽg tóg kanhkã tá vễnh vỹ ẽn mễg mũ, ẽprã nỹtĩn kỹ. Kỹ tóg ti to tag tó, ù tỹ tỹ vễnh kar kri ke ẽn ti, Topẽ ti, ha mẽ. “Inh kósin pir hã vễ. Inh fe pẽ vễ,” he ja tóg

nĩ, *Jesus* to. Topẽ tỹ pãnónh ki kãtére mũ ãn kri ke ja vẽ. ãn tá sóg *Jesus* tỹ tỹ ãn mág jẽ vé.

¹⁹ Hã kỹ ãg tóg ã tỹ vãsỹ Topẽ vĩ tó tĩ ag vĩ kri fig mũ. Tovãnh tũ ãg nĩ. Kri nĩm nĩ gé. Néj grug ri ke ti nĩ ãg mũ, ag vĩ ti. Néj gru vĩ ãg mũ kuty tá jẽngrẽ han tí. Kurã ke kã tá krĩg mág hã vĩ ãg fe tỹ mrin ke tí. *Jesus* to ken hã vẽ, hã vĩ: krĩg mág, he mũ. ²⁰ Kỹ, ãjag tỹ Topẽ vĩ rá to ken kỹ tag to jykrén nĩ, ha mẽ: ãg pijé vêsóg ki to jykrén ke mũ', Topẽ vĩ rá to', Topẽ tỹ ti vĩ tó tĩ ag mũ nén tó mũ ãn to'. Topẽ hã ne to ãg krĩn ke mũ'. ²¹ Kỹ Topẽ vĩ tó tĩ ag pijé vêsóg ki ag krĩ ki to jykrén kỹ rán ja nĩgtĩ gé'. Topẽ kuprĩg tỹ ag krĩn mũ ãn hã rán ja ag tóg nĩgtĩ. Hã kỹ tóg tỹ Topẽ vĩ nĩ, vẽn hã rán ki.

2

Ón kỹ Topẽ vĩ tó tĩ ag

¹ Hã ra ã ag tóg ón kỹ Topẽ vĩ tó ja nĩgtĩ gé, vãsỹ, *Israel* ã ag. Tag ve jé ãjag tóg ke mũ gé. ã ag tóg ón kỹ ãjag mũ Topẽ vĩ kãmén sór ke mũ, ha vem nĩ. ãn ag vĩ vĩ ón kỹ ãjag mũ mẽ há tĩ mẽ tĩnh ke mũ, hã ra tóg ãjag kókén ke mũ. Kỹ Topẽ vĩ vãhã ag tỹ tũ' henh ke mũ. ² Ge ra ã tỹ hẽn ri ke ag tóg ag jykre pãno han ke mũ, ag mré. Kỹ ã tỹ ag mré vỹjyre pãno han mũ ãn ag tỹ ag tigrĩn Topẽ jykre kato vĩ vĩ henh ke vẽ, ti tỹ ki hã tó mũ ra. ³ Ag tỹ jãnkamy mág ve sór vẽ, hã kỹ ag tóg ón kỹ vême sĩnvĩ tó sór mũ, ag tỹ ãjag *lograr* he jé. Hã ra ã tỹ ag vóg kónãnh ke mũ ãn tóg ag vэг tí. Ag tỹ tũ' he jé tóg ke mũ, kãnhmar, ha vem nĩ.

⁴ Topẽ tỹ jẽgnẽ jafã ã ag vĩ Topẽ vĩ mranh. ãn ag vóg kónãnh tóg huri, ag pijé krenkren'. Nũgme ki tóg

hur ag vãm, Topẽ ti. Tá ag tóg sigse kÿ nÿtĩ, *ferro* tÿ *corrente* tÿ. Tá tóg kuty nÿ. Tá ag tóg Topẽ tÿ vãnh kar jykre tugnÿm ke kurã ãn jãvãnh nÿtĩ. ⁵ Kÿ Noé mré ke ag vÿ nÿtĩgtĩ gé. Topẽ vÿ ag vóg kónãñ ja nĩ gé. Goj var tÿ tóg ù tÿ ti vĩ mranh mũ ag tÿ tũ' he kãn. Ag pijé krenkren'. Û tÿ 8 (ke) ag hã vÿ krenkren, ãn kã, hã vÿ: Noé, he mũ, ù tÿ vãnh kar mÿ: “Topẽ vĩ kri fim nĩ,” he mũ ãn ti, kar kÿ ti mré ke tÿ 7 (ke) ãn ag ke gé. ⁶ Topẽ vÿ ãmã tÿ *Sodoma* mré ãmã tÿ *Gomorra* tá ke ag vóg kónãñ ja nĩgtĩ gé, kÿ ãmã ãn tá ãn tóg kugpũr kãn ja nĩ. Ëg tÿ tag ve kÿ ãg tóg Topẽ tÿ ùn jykre pãno ag vóg kónãñ ke ãn ki kanhró nÿtĩ gé. ⁷ Ëmã ãn tá ùn pir vÿ kren, hã vÿ: *Ló*, he mũ. Ën vÿ jykre há nĩ ja nĩgtĩ, kÿ ti mré ke ag jykre kórég vÿ ti mÿ e tĩ ja nĩgtĩ. ⁸ Kurã kar ki tóg ag jykre pãno ve ja nĩgtĩ. Kÿ ti krĩ tóg kufy jagy nĩ ja nĩgtĩ, ti tÿ ag jykre kórég ve kÿ, ag vĩ kórég ke gé. Ën vÿ ti pir mÿ kren, *Ló* ti. ⁹ Û tÿ ti to: “ùn mág vÿ tÿ ti nĩ,” he mũ ag krenkren han ki kanhró tóg nĩ, Topẽ ti. Hã ra tóg ù tÿ vÿjykre pãno han mũ ag vóg kónãñ ke mũ, ti tÿ vãnh kar jykre tugnÿm ke kurã ãn kã. ¹⁰ Û ag vóg kónãñ mág pẽ han jé tóg ke mũ, hã vÿ: ù tÿ ag tÿ nén to éñ mũ han tĩ ãn ag, he mũ, ùn vãnh kavãnh tĩ ag, he mũ, ù tÿ: “Topẽ pijé tÿ ãg *Senhor* nĩ,” he mũ ãn ag, he mũ.

Ón kÿ Topẽ vĩ tó tĩ tag ag vÿ ãg vĩ kafãñ tĩ. “Inh hã tóg ki kanhró nĩ,” he ag tóg tĩ. Kÿ ag tóg kanhkã tãn ag kamẽg vãnh nÿtĩ gé. Ag to ag tóg vĩ kónãñ tĩ. ¹¹ Topẽ tÿ jẽgnẽ jafã ag vÿ tag han tũ nĩgtĩ, ha mẽ. Kanhkã tãn ag to ag tóg vĩ kónãñ tũ nĩgtĩ, Topẽ rĩnve. Ag tÿ ù tÿ ón kÿ ti vĩ tó tĩ ag tar kãfór nÿtĩ ra ag tóg

kanhkã tân ag to vĩ tũ nĩgtĩ. ¹² Ag jãvo ù tỹ ón kỹ ti vĩ tó tĩ ên ag vỹ krĩ tũ nỹtĩ, vãnħ kã mũ sê ag jykre tũ ri ke ag nỹtĩ. Vãnħ kã mũ tóg tĩgtĩ, sê ti, êg tỹ ti to vãji kỹ ti tén jé. Tag ri ke ag nỹtĩ. Ag tỹ kanhkã tân ag ki kagtĩg nỹtĩn kỹ ag tóg ag to vĩ kónãn tĩ. Hã kỹ Topê tóg ag tỹ tũ' henħ ke mũ, êg tỹ sê tén tĩ ên ri ke. ¹³ Ag tỹ ag jykre pãno kajãm hã vê. Kurã ki ag tóg ag tỹ nén to én mũ ên han tĩ, mỹr, ha mẽ. Kỹ ag tóg ag mré jêg tĩ gé, ag tỹ fênhta han kỹ. Ha ra ag tóg nén tỹ êg mỹ'a han tĩ ên hã han tĩ, ag tỹ ag mré jên kỹ. Jykre régre ag nỹtĩ. Ón kỹ ag há nỹtĩ ve nĩ. ¹⁴ Ûn týtá fag kar to ag tóg én tĩ, fag ki êvãnħ kỹ. Topê vĩ mranh sór ag tóg tĩ. Ti vĩ mranh to ag tóg krónħ ke tũ nĩgtĩ. Ûn krój ag krĩn kónãn ag tóg tĩ, ag tỹ ag mré mranh jé. Ag topê vỹ tỹ jãnkamy nĩ. Topê vỹ ag vóg kónãn ke mũ, ha vem nĩ. ¹⁵ Topê japry ti tovãnħ ag tóg. Vãgfor kỹ ag nỹtĩ. *Beor* kósin tỹ *Balaão* ên ri ke han ag tóg tĩ. Ên vỹ jãnkamy to há tãvĩ nĩ ja nĩgtĩ. Hã kỹ tóg *povo* tỹ *Israel* mỹ vĩ kónãn ke ên to jãnkamy ve sór mág ja nĩ, pã'i mág tỹ ti mỹ: “ha ag mỹ vĩ kónãn tĩg, inh jagfy,” hen kỹ. ¹⁶ Hã ra Topê tóg ti mỹ vĩ tar han, ti tỹ ti vĩ mranh kỹ. Hã kỹ ti mẽg tỹ *burrica* fi tóg fi vĩ vãnħ ra ti mỹ vĩ ja nĩgtĩ. Êg tỹ jagnê mré vémén ri ke han ja fi tóg nĩgtĩ. Ti mỹ vĩ kỹ fi tóg ti tỹ vễjykre kórég han ke mũ ra tỹ tũ' he mũ, ti tỹ ón kỹ Topê vĩ tónħ tĩg sór mũ ên kã.

¹⁷ Ón kỹ Topê vĩ tó tĩ ag vỹ goj nĩhỹg ja ki goj tũ ên ri ke nỹtĩ. Kanhkã góg ri ke ag tóg nỹtĩ gé. Kãka tỹ vễjo vóg kỹ tỹ tũ' he ên ri ke ag nỹtĩ, ù tỹ ón kỹ Topê vĩ tó tĩ ag. Topê vỹ kuty tãvĩ tá ag vin ke mũ. ¹⁸ “Ûn mág vỹ tỹ inh nĩ,” he ag tóg tĩ, ón kỹ. Krĩ tũ ag nỹtĩ. Nén ù vẽnħmỹ kar to én ag tóg tĩ. Nén ù

tỹ ãg kavénh tĩ ên to én ag tóg tĩ. Vějykre pãno han kỹ ag tóg ù tỹ ùri Topě ki ge sór mũ ag krĩn kónãn tĩ. ¹⁹ “Jatun mỹ ãg tóg ãg tỹ nén han sór mũ ên han kãn ke mũ. Topě vỹ ãg to jũnh ke tũ nĩ,” he ag tóg tĩ, ón kỹ. Nén tỹ ãg kavénh tĩ ên hã han ag tóg tĩ. Kỹ tóg tỹ ag jagrẽ nĩ, ãprã vějykre ti. Ëg tỹ nén ù tovãnh sór mũ ra tovãnh ki kagtĩg nĩ ên vỹ tỹ ãg jagrẽ nĩ sir, mỹr, ha mẽ. ²⁰ Ëg *Senhor* tỹ *Jesus Cristo* ki kanhró ja ag tóg nỹtĩ vễ, ãg kren han mũ ên ti. Ti tugrĩn ag tóg ãprã vějykre kavéj kar tovãnh ja nĩgtĩ vễ. Hã ra ag tóg ag tỹ nén tovãnh mũ ên han mãn mũ, kỹ tóg tỹ ag jagrẽ nĩ mãn mũ sir. Kỹ tóg ùri kórég kãfór nĩ, ag mỹ. ²¹ Ag tỹ Topě japry ên sãn ja tũ nĩ ra tóg há tĩ vễ. Hã ra ag tóg ti sãn sĩ han kar kỹ tovãnh mũ, Topě tỹ ag mỹ vėnh vĩ há jėnėg mũ ên ti. ²² Ag to ãg tóg tag tó tĩ, ha mẽ: “*cachorro* vỹ ti tũgtũv ên ko mãn tĩ,” he ãg tóg tĩ. “*Porco* tóg ti vėnh kype há han kỹ jẽ ra óré mũ vėsĩn mãn tĩ. Kỹ tóg vėnh kavénh mãn tĩ,” he ãg tóg tĩ gé. Û tỹ vějykre kórég tovãnh kar kỹ han mãn tĩ ag to ken hã vễ.

3

Jesus kãtĩg mãn

¹ Inh kanhkã', ãjag to sóg há tãvĩ nĩ. ãjag mỹ sóg vėnh rá ù han huri. Kỹ sóg ãjag mỹ rán mãn mũ ha. Inh vėnh rá kar ki sóg ãjag jyvėn tĩ, ãjag tỹ nén jãnhkri hã to jykrén kỹ nỹtĩ jé, ãjag tỹ tag kã jatun tũ nĩ jé. ² Topě vĩ tó tĩ ag vỹ vãsỹ Topě vĩ tó ja nĩgtĩ. Ën mũ ěkrén nĩ. Kỹ *apóstolo* ag vỹ ãjag mỹ tó ja nĩgtĩ gé, ãg *Senhor* tỹ nén to ãg jyvėn mũ ti, ãg kren han tĩ ên vĩ ti. Ën mũ ěkrén nĩ gé. ³⁻⁴ Kurã tỹ ěgno to hã ěprã

ke ũ ag vỹ ãjag to é henh ke mũ, ha vem nĩ. “Ti mỹ kãtĩg mãn mũ vỹ?” he jé ag tóg ke mũ. “Ti tỹ vãsỹ kãtĩg mãn ke vễ vễ. Hã ra êg jo ke ag vỹ vãsỹ tũg. Ti tỹ ti kãtĩg mãn ke tó mũ ra ag tóg kãgter. Kãtĩg ke tũ ti nĩ. Ga vỹ nĩnh mũ. Tũ' henh ke tũ ti nĩ, ga ti, ha vem nĩ,” he jé ag tóg ke mũ, êg to é he kỹ, ha vem nĩ. Ũn jykre kórég ag vễ, ũ tỹ tag tó mũ ag. Ag tỹ nén to én mũ ên hã han ag tóg tĩ. ⁵ Topê tỹ vãsỹ nén han mũ ên ki kagtĩg ag tóg nỹtĩgtĩ, ag tỹ ki kanhrãn sór tũ nỹtĩn kỹ. Topê tỹ vãsỹ nén han jan hã vễ, ha mẽ. Kanhkã han tóg, vãsỹ, ga ti ke gé. Ti vỹ tỹ tóg nén kar hynhan ja nĩgtĩ. Ga ên vỹ goj tỹ vễnh kãpãm kỹ nỹ ja nĩ, kỹ ũ tóg goj kri nỹ ja nĩ gé. ⁶ Ga ên kri ke kar ag vỹ hur tũg, goj tỹ, goj var mũ ên tỹ. ⁷ Kỹ êg tỹ ũri nén vég mũ tag vỹ tũ' henh ke mũ gé, ha vem nĩ. Topê vỹ ti tỹ tũ' henh ke to kurã nĩm huri. Kỹ tóg pĩ tỹ ti tỹ tũ' henh ke mũ, Topê tỹ: “tãg',” hen kỹ. Kurã ên kã Topê vỹ ũ tỹ ti vỹ mranh mũ ag tỹ tũ' he kãn ke mũ gé. Ag vóg kónãn ke kurã vễ sir.

⁸ Inh kanhkã', tag to jykrén nĩ, ha mẽ. Topê kurã vỹ êg kurã ri ke tũ nĩ. Kurã pir vỹ ti mỹ prỹg tỹ *mil* (ke) ri ke nĩ, kỹ prỹg tỹ *mil* (ke) vỹ ti mỹ kurã pir ri ke nĩ gé. ⁹ Kỹ tóg ti tỹ êg mỹ nén tó mũ ên tovãnh ke tũ nĩ. Ũ tóg: “han sór tũ ti nĩ, hã kỹ êg tóg vég tũ nĩgtĩ,” he tĩ, ón kỹ. Hã ra ag tóg hã tũ tó tũ. Ti tỹ ver êg to fe nĩ vễ. Hã kỹ tóg kãtĩg vãnh nĩ. Ti pijé êg kã mũ ũ tỹ nũgme ki kutê ên ve sór mũ'. Hã kỹ tóg ver êg mỹ kurã ũ nĩm mãn', kurã ũ nĩm mãn' he mũ. Kỹ vễnh kar jé ag jykre kórég tovãnh, ag krenkren jé.

¹⁰ Hã ra tóg kãtĩg mãn ke mũ, ha vem nĩ. Vãhã tóg kãtĩg ke mũ, kỹ tóg ũ tỹ êg tũ péju tĩ tỹ êg vatánh tá kãtĩg ri ke nĩnh ke mũ. Ên kã kanhkã tóg tov kỹ

kréj ke kÿ vár ke mũ. Kanhkã tá nén kar vÿ jonh ke kãn ke mũ gé, krÿg kar ag, pÿ ên tÿ ag tÿ kréj ken kÿ. Kÿ vãhã ga vÿ tũ' henh ke mũ, ga kri ke kar ag ke gé. ¹¹ Gen kÿ nén ù kar vÿ tũ' henh ke mũ. Hã mÿ êkrén kÿ vënh kãn sórm nÿ. Topê tÿ êg mÿ nén tó mũ ên hã han nÿ. Topê mÿ vënh vin nÿ. ¹² Topê kurã ên jãvãnh nÿ. Topê rãnrãj to vãsãnsãn nÿ, ti kurã ên tÿ kãnhmar tá krÿg jé. Kurã ên kã kanhkã vÿ pÿr ke mũ. Kÿ kanhkã tá nén kar vÿ jonh ke kãn ke mũ gé, krÿg kar ag. ¹³ Topê vÿ ti tÿ êg mÿ nén tó mũ ên han kãn ke mũ. Kanhkã tãg han jé tóg ke mũ, ga tãg ke gé. Tá tóg vëjykre kuryj tãvÿ nÿ. Êg tÿ ga tãg tag, kanhkã tãg tag venh hapê tóg tÿ.

¹⁴ Inh kanhkã', ãjag to sóg há tãvÿ nÿ. Topê kurã tag jãvãnh ãjag tóg nÿtÿ. Kÿ vãsãnsãn nÿ, ãjag tÿ kygnêg tũ nÿ jé. Vãsãnsãn nÿ, ãjag tÿ Topê mÿ jãnhkri nÿtÿ jé, ãjag tÿ ti há ri ke nÿtÿ jé. Kÿ ãjag tóg ti kato vãsãnsãn ke tũ nÿ. ¹⁵ Ha vé, ti tÿ ver êg to fe nÿn kÿ êg tóg êg jykre kórég tovãnh kÿ krenkren ke mũ. Tag rán tóg huri ãjag mÿ, êg kanhkã tÿ *Paulo* ti. Ti to sóg há tãvÿ nÿ. Topê vÿ ti mÿ krÿ há tãvÿ nÿm. ¹⁶ Kÿ tóg, ti tÿ ù mÿ *carta* han kÿ isÿ nén rán mũ tag ri ke han tÿ gé. Ti vÿ tóg inh vÿ ri ke pë nÿ. *Carta* e han tóg huri, *Paulo* ti. Kÿ ti *carta* ù vÿ to jykrén jagy tÿ gé. Kÿ ù ag tóg ti *carta* to ke mũ ra ki kagtÿg nÿtÿn kÿ ti to vÿ kónãn tÿ. Û tÿ ki kagtÿg ag vë. Ûn krój ag vë, ù tÿ ti tÿ rá to vÿ kónãn mũ ag. Topê vÿ rá ù to ag tóg vÿ kónãn tÿ gé, *Paulo* tÿ rá kóm, ên ag. Tag tugrÿn ag tóg kãgter ke mũ, ha vem nÿ.

¹⁷ Inh kanhkã', ãjag mÿ sóg rán kãn huri. Hã kÿ vënh ki rÿr há han nÿ. Ker ù tÿ ãjag mÿ ón kÿ kri nÿm hë'. Ke tũ nÿ mũ ra ag tóg ãjag *lograr* henh ke mũ, ù

tỹ ãjag fe kavénh sórm mũ ag, ãn jykre pãno ag. ãjag tỹ ag vĩ kri fi tugrĩn ãjag tóg vãgfor ke mũ, ha vem nĩ. Ëg tỹ kãgnó ki tĩr ri ke han jé ãjag tóg ke mũ, ha vem nĩ. ¹⁸ Ëg *Senhor* ki kanhrãn ke hã to tar nỹtĩm nĩ. Ti tỹ Ëg tar han mũ tag hã ve sórm nĩ, Ëg kren han tĩ tỹ *Jesus Cristo* ti. Ti hã mỹ Ëg tóg vĩ há han ke mũ, ãri, kar kỹ kanhkã tá ke gé. Kỹ tóg tũ' henh ke tũ pẽ nĩ. Hã vẽ.

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-04

PDF generated using Haiola and XeLaTeX on 11 Nov 2022 from source files
dated 26 Mar 2022
16af52c8-0e45-5e91-b36c-cd314d36d7fc